

四庫全書

集部

欽定四庫全書

集部

海岱會集卷二

詳校官中書臣孫衡

侍讀臣孫球覆勘

總校官降調編修臣倉聖脉

校對官中書臣潘曾起

謄錄監生臣周敦復

欽定四庫全書

集部八

海岱會集目錄

總集類

卷一

古樂府六十三首

卷二

古樂府三十六首

卷三

五言古詩五十六首

卷四

五言古詩二十六首

卷五

七言古詩三十三首

卷六

五言律詩三十九首

卷七

五言律詩三十四首

卷八

五言律詩四十首

卷九

五言排律四首

卷十

七言律詩七十二首

卷十一

五言絕句詩三十首

卷十二

七言絕句詩三十八首

臣等謹案海岱會集十二卷明石存禮藍田
馮裕劉澄甫陳經黃卿劉淵甫楊應奎八人
倡和之詩也存禮字敬夫號來山益都人弘
治庚戌進士官至知府田字玉甫號北泉即
墨人嘉靖癸未進士官至御史裕字伯順號
閻山臨朐人正德戊辰進士官至按察司副

使澄甫字子靜號山泉壽光人正德戊辰進
士官至布政司叅議經字伯常號東渚益都
人正德甲戌進士官至兵部尚書卿字時庸
號海亭益都人正德戊辰進士官至布政司
叅政淵甫字子深號范泉澄甫之弟正德庚
午舉人應奎字文煥號澠谷益都人官至知
府嘉靖乙未丙申間經以禮部侍郎丁憂里
居田除名閒住淵甫未仕存禮等五人並致

仕乃結詩社于北郭禪林後編輯所作成帙
冠以長至日五月五日九月九日上巳日七
月七日會集序五篇其詩凡古樂府二卷五
言古詩二卷七言古詩一卷五言律詩三卷
五言排律一卷七言律詩一卷五言絕句一
卷七言絕句一卷計詩四百七十九首其編
輯名氏原本未載惟卷首萬厯己亥魏允貞
序稱友人馮用韞以海岱會集自遠寄至則

出自臨朐馮氏家矣八人皆不以詩名而其
詩皆清雅可觀無三楊臺閣之習亦無七子
摹擬之弊其社約中有不許將會內詩詞傳
播違者有罰一條蓋山間林下自適性情不
復以文壇名譽為事故不隨風氣為轉移而
八人皆閒散之身自吟咏外無別事故互相
推敲自少疵類其斐然可誦良亦有由矣乾
隆四十六年二月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

海岱會集序

夫子曰先進於禮樂野人也後進於禮樂君子也如用之則吾從先進舍君子從野人貞少日但耳解耳不知其真也及壯而仕於朝游四方而老見諸食飲衣飾器具拜揖稱謂間日新而月異一倡而羣和不知於野人君子何歸至其發為詩若文彌工彌下彌奇彌可厭長淫競靡標新示詭亂幾萌矣世安得治因念先進者當

不然友人馮用韞一日以海岱會集自遠寄至讀一再
而其對景言情即事屬辭質而葩逸而典清新而暢不
矯不艷異乎今君子詩矣豈古昔所稱香山洛下者流
與貞生也晚不及見其人而既聞其言矣不可知其人
乎因為之說曰禮者嘉之會也詩者樂之變也海岱會
集雖謂先進之禮樂可也後學者其審所從夫萬厯己
亥夏六月朔日後學魏允貞書

長至日海岱會集序

嘉靖乙未日南至於是石子藍子二劉子黃子楊子馮
子七子者相與會尋詩盟也厥旅維蔬厥飲維醕厥詠
維詩賦蔬上酒行顧瞻雲物諸子咸樂間山子乃言曰
吾讀易至復未嘗不三復焉曰穆哉天地之化厥小大
往來之幾吾於是觀焉象曰雷在地中復復者復也於
時為陽反之象於人為徙之象諸子務日新者也乃今
復也諸子其焉復哉於是范泉子賦羣龍喜諸陽浸長
也間山子曰有心乎致用也復哉復哉海亭子賦娛親

時歸養也將以厚志篤倫也敦乎復者也山泉子賦時
養時養者若時以自養也養靜以利動也養陰以厚陽
也以為政則昌以保身則強斯閉關之道乎來山子賦
考業曰吾樗散林麓二十餘年矣顧乃復事觚簡耶閭
山子曰復休哉澠谷子賦尚友中行獨復勇哉楊子北
泉子賦遠遊言不遠東海以彙征也其朋來无咎者耶
閭山子乃賦倦飛曩者冥行因覺動觸機畢不遠之復
吾愧未能也乃今得從諸君子遊以省吾過庶其免於

大悔乎詩成俾童子歌之婉而不媚壯而不激密而不
弇閎而不肆其聲和其律諧其氣大以昌洋洋乎若聆
黃鐘之音焉閭山子曰吾於復見天地之心吾於羣作
見諸子之心嘉靖十四年十一月之吉閭山馮裕序

五月五日海岱會集序

蓋聞百川學海羣山宗岱淳珍峙秀溜媚蘊輝瀛嶼風
高快鵬搏之九萬芝亭雲冷悵鶴駕之三千谿域無疆
乾坤有定寶藏興焉材幹殖焉懸藜垂棘火齊夜光鯤

鼇蛟鯨琳琅玕神草若木黃金丹砂蘭芷杜蘅梓枏
 豫章連城照乘之貴凌霄合抱之良不能獨當也是以
 磊落瓌琦光明俊偉之士產乎其間粵若二代監觀侈
 周公之禮樂六經述作富孔氏之文章營丘建邦太公
 鷹揚於東國即墨守土田單火縱於齊城魯連高蹈以
 辭兼金玉蠲捐生用全畫邑鮑叔之深知思逾父母平
 仲之久敬義重友生三士悲歌于梁甫兩生耻赴于藻
 庭乘桴而知幾羨鴟夷之高致擁琴而適趨慕稷丘之

清風家家積隋侯之明珠人人抱荆山之璞玉古今為
盛俯仰興懷然而見賢思齊是為尚友登高作賦更有
諸公遂盍簪于蓮社特講信于雞壇合志同方賞心樂
事乃若來山之清癯並閭山而挺秀北泉之浩博與范
泉以同流孤峯峭壁海亭仰之彌高幽壑平川澗谷探
之愈遠繆以山下出泉之蒙徒有河伯望洋之嘆三旬
投散竭一日之幽歡百年命車寓七人之上列登龍有
願附驥無能麗澤猶滯砥石安賴是月也時維仲夏律

應莛賓日交月諸斗午參橫螳螂修斧伯勞發聲石榴
夕艷木槿朝榮乾道之變化也節嗜止欲避暑頌冰羞
桃烹驚象德封功朱索驅厲寶符辟兵聖人之與能也
由是對時育物命侶呼童涓佳節際良辰攜桂酒雜椒
漿坐落花以開宴疊角粽以侑觴長風送暑搖輕箑而
御纖締茂樹垂陰浮碧瓜而沉丹李芳草鬪青擊冰簾
於石澗蘭湯浴潔藉夏屋于雲門縷絳絲而繫臂趨吉
避凶進昌陽以引年安身利用孫登之草裳隱不嫌于

土窟羊茂之版榻貴不驕于專城仙侶神府日服玄冰
之丸玉闕金宮夜聽秋霜之曲逍遙箎簞嘯傲山池弋
雲飛之高鳥釣波蕩之游鱗諸葛綸巾抱膝泰山之側
管寧皂帽晞髮遼海之陰某水某邱一觴一咏樂天知
命追古傷今用舍行藏尤增感慨形骸以外復誰可知
芝蘭在傍覺我形穢雲巖石室樂帝舜之薰風蓬島天
池沾皇明之化雨留連景暮邂逅詩成詞曰菖蒲萼綠
榴花紅火雲障日山庭空蘭漿挂酒歌薰風佳辰令節

心和同滄溟以西秦岱東羣公暇日忻相逢被髮酣暢
封禪亭拍手笑傲蓬萊宮行復滄溟波揚塵幾更秦岱
培塿平百年不渝金石盟子孫保之安無傾嘉靖十五
年五月初五日山泉劉澄甫序

九月九日海岱會集序

重九高秋日晶風淑麗澤諸友不速偕集一揖再茶坐
無雜言迺各出所著古賦樂府古今詩相請相遜相諗
評焉已迺進饌饌潔而無殺迺酌酒酒清而不多迺相

議擬再作之題于雅于著于取義者焉蓋相遜也歛然
相受也憮然相正也惔惔然相忘也怡怡然又作曰是
維五陰之候而月九者陽數也日又如月之數焉陽健
也昭也亨也君子用事重陽嫌陰也故重九之賞逝矣
出觀于茱萸曰藥之良也物至時而後茂者鮮矣再觀
于菊黃華沃若曰芳而不艷無競乎衆芳也何也暇而
合其離會而游于藝弛而歸于張禮也故仰觀于時以
勵志也俯感于物以興情也情志之慎詩之教也辭賦

樂府皆古之流也為其言而弗若其教者蕩也抑嘗讀詩至板蕩諸篇悼其作者憂虞凜凜焉今吾優游容與于文于晏也夫非荷一人之慶之溥乎仰日月而不負其照臨雖在隱可也且古之君子歸于鄉也有為師為望之責焉茲舉也或將式之或且瞻之為瞻可及也為式則難矣言之弗畔之難也畔道而于已于人無弗蔽也矣不敏獲從斯游教益幸多敢弗黽勉辱次授簡則謹繹而有附焉嘉靖十五年秋九月九日海亭黃卿序

上巳日海岱會集序

齒德相兼願入芝蘭之室朱青異染期歸道義之場交
得其道則千里同心擇匪其人則同室反面谷風之誚
未免角弓之刺安逃古重素交有由然矣余取友于天
下獨有得於郡中非鄙流俗之濫實慕賢達之興斯會
也主會以長設饌有時酒惟暢懷詩各言志水陸之陳
有戒蔬茗之供得宜無絲竹之亂耳無恐懼之寘懷敢
矜長而諱短皆合志以推誠值上巳之辰屬良朋之約

夫上已者和風甫動甘雨初晴衆卉含英修條逞綠競
遊溱洧之濱歷覽桑麻之野羽觴輕泛朱翠偶逢接軫
連鑣曾知市藥之穩旁瞻驚拜須仗蕭艾之功亦不過
快宴喜之私惜晷刻之運而已勢利相眩孰不知有此
樂哉矧我朋從潛消塵想升階叙坐分韻構思哀帶我
冠更無拘束名山勝水皆合襟期喬松叢竹雖非曲水
之觀宿釀新茗頗類蘭亭之雅洋洋然而來欣欣然而
往衆稱佳會也文會固佳高人可數更須借諛俱有鄉

評石雖可轉來山臞體而雄心青出於藍北泉玉質而
鐵面馮閭山之寬厚足比大馮黃海亭之通融可追叔
度號伯起為夫子即澠谷之明經或後或先相伯相仲
山泉賢者為兄范泉愚者為弟乃非晉世之龍徒羨河
東之鳳曰官而官曰家而家兄則有之矣萃集名時密
親故舊有其志而無人遇其人而無地迹亦萍水情實
鄉閭咸高材疾足之英適解綬投簪之日頗因文字深
寄衷腸尚友之會何如耶且公議莫掩良辰幾何近則

正之遠則宗之流麗者尚法流麗清新者尚究清新典雅可求自知理趣溫厚能入尋造精純喜忘懷合道之交有博物洽聞之助文章綴其枝葉德行樹乎根本屈原輸忠揚雄頌莽咸奮舌而並作果匿瑕而同光若夫辭金折節脫黨全孤郭有道之人倫東國董仲舒之正誼西京曾專較其詞章姑指摘其心術君子入則篤行出則友賢斯之謂歟規勸有益盟約自堅能學為正人自發為正論寄身翰墨漸成篇籍豈坐雕蟲之名允為

海岱之會應命作叙長者各有述云嘉靖十五年三月初九日范泉劉淵甫序

七月七日海岱會集序

蘭亭蓮社風流遺百代之芳洛下香山矩度傳千年之美鄉約質淳儀式具在吟壇陶寫意例多嚴高蹤難擬繼軌遂尋世代固有後先人心可無今古盍簪載會斷金啟同心之利伐木詠詩麗澤求有益之朋稷下鴻儒素稱上智三齊人物夙號多賢矢書激義雄辨成家劍

閣登刻知孟陽之藻思雕龍書就見劉勰之博識三都
不亞於兩京中論何愧乎中說舉此以槩其餘難鳩獨
行大節源源有人經術文章紛紛多士慨我輩之生既
晚耳先達之風未泯乃依雞壇之盟共赴文會之招假
梵宇之遠塵資厥曠僻定蔬食之真味禁其繁文設茗
飲以沃心飛羽觴而醉量歲叙孟秋時當七夕金祇司
候火曜方流積雨收而涼颼生浮雲散而晴日出芳林
添翠嘉穀增實瞻彼南山白鶴來駐歸然寶殿青鳥遙

臨方將曬腹內之書共約証河邊之駕凡我友耆並皆
佳妙篤行石奮探禹穴而寄跡多學藍尹捋虎鬚以厲
聲世襲衣冠之倭家傳身繡之英詩書故里閥閱名門
孝綽之聰穎元方難兄孝標之博達獻之佳弟可名雙
鳳亦是二龍持憲而淮晉草靡山泉嚴威把麾而揚粵
春生閭山慈惠馮唐難老黃霸多能每法叔度之汪度
涵洪愧無得意之加意賞鑒產同青土散處海鄉期月
一集不疏不數文言是讀無忤無求各據胸藏之奇庸

灑楮幅之麗作者之意情見乎詞醉翁之高志不在酒
雕蟲從事庶成書以成言撰述何勞蓋因文以見道千
里神交德星夜聚襟懷瀟散形迹不存意度優閒拘礙
何有數載竒逢一時良會高明耆舊俯就而切磋不忘
謏薄疎庸攀仰而驅策實賴四座馨香咳唾頓成于珠
玉廣筵雍穆談笑足驗乎經綸挽星斗於筆芒驅海濤
于硯底變態多端風雲極其聚散巧姿殊狀月露挹其
慘舒上瞻天漢之清淺細數烏鵲之飛翻入耳風鳴絃

管弄隔牕鳥語唱歌聲竹林七逸事清談而入醉鄉雁
塔羣仙矜曠蕩以臨花市豈若沉潛詩賦以養心是乃
吟咏性情而寄興掇藝苑之菁華叙彝倫之純旨手舞
足蹈真欲駕輕鴻以翱翔志同道合殆將挾飛仙而長
往律聽夜半之聲悟解琴中之趣論放逸不若東山語
繩束難擬獨樂實生世之佳致真斯文之要歸廢墜興
于不講豈是崇虛新奇舉于久缺非為離俗澠溪雲窟
發潛曜以舒精西岱東溟吐靈氛而作氣盛集常茂流

芳彌遠大書濃染各各翻錄一通錦軸縹囊人人琛藏
十襲東壁燦輝輝之彩南箕避燦燦之光授簡有倫禱
昧猥及含毫叙事荒穢何堪敬疏小引以冠羣玉嘉靖
十五年秋七月七日澠谷楊應奎序

欽定四庫全書

海岱會集卷一

古樂府

君馬黃

馮裕

君馬黃我馬駟馬不同色人一心前年聯鑣洛陽陌今年共踏洋溪雪

前題

劉澄甫

君馬黃臣馬白君馬日立赤墀中臣馬行當雪山磧玉

勒嘶秋風凋弓抱明月十二閑中雲錦花三千里外寒
風沙香闌紅顏泣成血邊城白骨多如麻交河北流無
青草年年走馬交河道

有所思

黃卿

有所思思無狂獨居局戶意何飄揚五岳伊邇崑丘渺
茫愚公移山河伯望洋出入作息歲時田桑控馬以綏
止水芳塘蛛絲在簷蠶絲在房人生無羽翼思遠徒傍
徨

戰城南

馮裕

前歲戰在雲中今歲戰在遼東
玉林塞南穹廬滿廣寧
城邊人烟空年年春草腓
更綠不知征戰何時窮將軍
枕戈黃龍戍天子盱食甘泉宮
憶昔犁庭絕漠北馬支
初連入中國邇來牧馬漸南侵
河外三城收未得朝出
戰暮忘歸別新婚遠庭闈
忠臣義士心所希但願黃金
印似斗寧辭白骨甘如飴

巫山高

黃卿

巫山高邈難量望望隔雲夢江漢有舟楫山深不可窮
珍壁與丹砂穴深虎豹叢田居有牖步有筇無泛洪波
兮無登奇峰

蜨蝶行

劉澄甫

春風蝶翩翩春社燕來舞相逢東園中參差桃李樹銜
之哺新雛香魂託誰怙秋深蝶亦稀秋社燕忽去得失
無可問惆悵寒江雨

前緩聲歌

疾趨無穩步，猛漿無安流。風禽難比翼，湍鱗難縱遊。
人生適意耳，何為苦淹留。帳中越女歌，席上楚妃歎。
婉婉燕姬柔，裊裊秦娥粲。白日忽已匿，華鐙猶未息。
懽極將奈何，悲來淚霑臆。

前題

劉淵甫

高弦無細響，急水無迴波。息我忿悁心，聽彼從容歌。
宛曲蘭室幽，柔軟春風和。舒徐稱皓齒，轉換隨輕羅。
有短更有長，非少仍非多。淒清舞自憐，斷續今如何。
雖嘆霧



中花難比燈上蛾常使樂有時一任朱顏酡

董逃行

劉澄甫

一尺布千里草兒童謹非不早長樂火郿塢灾天之道
往復來允之墜邕之獄終於盡有榮辱一董滅一董生
去長安營許京四寇去仲英挫五馬來孟德破魏公錫
晉公繼作者誰了不異福中禍禍中福反掌間真倚伏

前題

劉淵甫

杞人無事懷憂坦平之地生丘補袞有具皆休都邑偶

爾綴旒衣冠豈但含羞

鳴雞犬吠家家往時爭競浮華火消沙散如麻狂風振
樹驚鴉兵鈴入手堪嗟

廣廊大廈森然倚憑氣焰薰天燕歌趙舞輕綫一朝事
業變遷追思快日豐年

穿石斷幹因循納基絕胎正人往來却似避秦覆車之
戒猶新禍兮與福為隣

榮枯徒令我傷須知本固根強移山之術空忙幾見終

日飛霜何如守分安常

西門行

馮裕

浮雲日夜行流水赴東海人生能幾何容髮忽已改醜
酒炙肥羊瓠葉亦可采及時召良朋不樂復何待

前題

黃卿

出西門望雲之岑碩人在何許言念勞我心一解採藍

葉薦白華擷去不盈把欲濟河無涯二解路逢游冶子

招我以螺觥芳醇羅嘉俎欲留還不能三解我行約麋

山塗阻渴下掬泉清且深上有梧桐如銅青欲取繫絲

徽黃金

四解

居常嫌擾擾浮世何所營願言慎服食綿

綿學無生

五解

前題

楊應奎

索居思沉鬱西門聊躑躅顧景開逸懷尋樂散幽獨汨
汨陌上塵湛湛溝中綠長嘯登危峯濯纓臨碧流臂鷹
走黃犬繫馬醉青樓但知樂意洽寧復幾時休醇醪味
本甘肥牛炙亦美呼我所歡人解我心中擬不醉莫來

歸厭厭猶不已人生七十稀所患常千百惜陰各有為
勞勞自成拍焚膏繼日晷兀兀髮已白洪厓與浮丘欣
欣難枯槁白日生羽翰紅顏常不老睠此血肉軀安得
復年少死生既有命富貴必由天黃金能聚散日月易
推遷財虜不解事空為人所憐

東門行

馮裕

戚戚困故里衣食不自謀拔劍欲出門妻子苦遮留云
不願富貴但願相對貧豈知男兒志四海區區離別何

足論

前題

黃卿

出東門茫茫夾巷通衢孰指適市廛多隱語目視流波

笑相測

一解

持粟易農器器少兵械多南山有鐵可採

無冶鐵奈何

二解

爾賈不我告實但會誕黠可知方不

用矩圓不用規酒醕不及止何為

三解

欲飴得藥汲水

成冰彼人笑傲予歸以平險阻密林悵何高深馬駕緩

行猱輕以升

四解

對酒

馮裕

對酒欲歌咏冬廬暮不寒外聞擊壤叟邀賓共蔬盤讀
歌秋竹曲願賡甘棠篇叟謝止飲和曲良難三農隱憂
孰與為歡冬鮮霰雪恒晴而暝遺蝗伏隴宿麥垂乾願
言潔酒供醴紛拜龍祠雲壇今此下民災孽風伯雲師
豈其俯顧豫安余敢同無憂之華屋綺紈

又

對酒歌豐年年豐實堪樂東家釀新黍西舍儲舊醕南

隣鸚鵡盃北里鷓鴣杓時有杜康來且共淵明酌傾銀
而注玉何如瓦與礫烹羊及炙牛爭似藜與藿倉箱喜
盈收場圃多刈穫晝無捕蛇役夜少豪吏索頌白遂安
飽黎黑免飢虐天子甚聖明宰府兼廟畧草木已喬
鷺飛魚自躍但寡旱蝗灾聊爾紓民瘼

碣石篇

黃卿

碣石復出陟彼壯觀羣山半沉澣渤浮天日光湧蕩鯨
鼉晏眠艦艘游汎渺渺澄漣海不揚波維國之正越裳

肅慎來貢雍雍秦橋漢廟堙沒蕪墟彼碩垂釣悠哉樂
且

前題

劉淵甫

東海碣石觀海如天深自有底寬亦有邊桂樹匿陰扶
桑出陽千變萬化海水如常

東海碣石觀海利多海賈貪求輕視風波利同害同藏
珍匿寶螭龍有珠得之更好

東海碣石觀海歎生一旦成田有時結冰積之歸墟泄

之尾閭欲保終身養之在初

東海碣石觀海深與古稱達人想不輕蹈海不揚波明
時建功壯年不勵白首難成

滿歌行

馮裕

百憂集我懷清酒滿金壘春風忽又到桃李叅差開一
飲一盡醉不用主人催古來稱達道惟有漆園叟朝菌
齊大椿況復論好醜悠悠天地間盡是無何有

前題

劉澄甫

傾樽對歌人生幾何日邁月征樂少愁多天缺西北地
漏東南盈虛消息矧爾人間磐石可透井溜可穿固亦
人力漸摩使然簣土成丘涓滴成河積寡為衆匪由其
他舜禹在位巢許棲巖周公鳩徙接輿鳳騫彭聃為夭
顏冉為壽求仁得仁修短何咎生者如寄死者如休樂
天知命而復何憂

前題

黃卿

處世將擇安波翻山峻事故多端甘貧白首進退知難

仰天見星昏聚曉殘空懷不平髮怒衝冠忽忽非少壯
富貴不可求擊膺隱形巢父忘愁吾將為賓復稱許由
哲人逝矣將誰與儔趨炎惡涼遽爾飛騰重義輕利從
善如登毀譽在人心兢兢泰否有時君子循常

闕

想多傷董生下帷法彼修藏疏老散金任彼徜徉
可行可止切戒沽名嘆惜佳辰酒味歌聲無尤無怨
何辱何榮俯仰之間遣興抒情當風秉燭碌碌虛勞樂
不可極會見霜毛天長地久恬養為高

公無渡河

劉澄甫

公乎公乎河水瀧瀧中有蛟龍得人則喜我心慄慄公
乎公乎河水悠悠下有神鰲噉人至骨我心慄慄公乎
公乎爾之游矣載沉載浮我之憂矣無梁無舟公乎公
乎腰錢胥溺利害綢繆剖珠自藏吾將何尤

獨漉篇

獨漉獨漉駟馬丹轂時運苟去馬斃車仆桃李不言下
自成蹊烏鳥莫辨誰知雄雌猛虎負隅徒搏何為蝮蛇

入手解腕已遲富貴可得執鞭當前貧賤可離脫屣何
難禍福靡定無乃自求怨天尤人君子不由陳母知廢
陵母知興俟命居易智者無名

前題

黃卿

獨漉陂澤行潦漲渾波渾何傷客行無津翩翩白鷺泳
水不濡逐鷺逐獺無為爾虞确确者石河流滌之有美
一人其介如斯誰探古穴獲璧冠玉願言珍藏千金莫
贖豹虎近郭嬉遊縷縷壯士不刺磨劍何為暮雨魑魅

嘯見其吻雷轟霆擊吁為齏粉

善哉行

劉澄甫

作偽日拙作德日休為善常樂為惡常憂禍福無端真
若循環有酒不飲空復長嘆上山采芝偶逢安期與棗
似瓜其甘如飴入海求仙忽見偃佺惠藥一粒其色如
丹自知歲短將可奈何慚無魯陽舉手揮戈日東月西
素髮叅差親友在門且慰須臾

君子行

馮裕

歧路異燕越素絲基玄黃君子慎顏末志士思鍼芒辭
輦恐嫌疑震主憂危亡鸞鳳化鷓鴣屠繒為侯王天道
尚反覆人事殊難量遺金豈足辨還牛仍自明磨刀不
見損砥石兩相傷啖服欲求飽身斃還為殃聖人絕思
慮元化直茫茫

飲馬長城窟行

劉澄甫

飲馬長城窟城邊多白骨征馬嘶不前戰士愁難越秦
皇築紫塞萬里空流血漢祖圍白登三軍困飢渴馬邑

夜蕭條龍沙風慘慄十去七不還一札九嘆息男兒誇
健少婦女哭嗚咽凱歌何時唱旄頭何日滅善守在四
方王者無奇烈

前題

黃卿

平溪清見底泛泛雙鴛鴦中流見羣鷺啄啄相頡頏佳
人呼征鴈嘹唳發三邊君子佐戎幕偏師逐右賢門前
風起塵塞上風揚沙昔時柳飛絮今時雪作花白草獸
駭奔中有龍種馬八尺蹄如銀駟駟不知價捉馬獻天

廢願君離塞下

前題

劉淵甫

長城築枯骨城下決寒流飲馬泉水深閉目遠天愁流
水何時竭苦戰何年休鞍上珊瑚鞭手中金絡頭風沙
慘漫漫鴻鴈鳴啾啾欲得家鄉書肯念征人不敢繫兒
女思止因父母憂丁寧閨中婦善為甘旨謀生當歸故
園死當葬故丘

艷歌行

劉澄甫

兩兩雲中鶴雙雙池上雁朝飛洞庭湄夕止天山畔奮
翻共雲霄唼藻同燕婉良匹影不孤宕子情欲斷雖寄
白頭吟自愛黃金館尺素書竟絕長門賦空歎本效孟
光潔不學文君粲心貞道苟合萬里即閭閻幽懷寫金
石懽然卧江漢

前題

黃卿

苑荒水邊樹茁條壘石間孀嫗攜兩女逶迤上墉墻亂
葉前迷路潦水跬步難貴家車如屋呼可共載還長娃

低粉頸伸娃發頰顏阿母謂勿嗔徐行車自前健禽嚇
青鳥義鵲不可干

相逢行

馮裕

生死識交情貧賤見交態白頭尚如新青眼即傾蓋班
荆信難值斷金義可會荆杞堂隅中胡越形骸外金蘭
心與同鷄黍期若待雨落復為雲恩深反成害重淵等
艱深九疑紛向背久要變須臾戈矛生眦睚高論廣絕
交朋從悖舊愛

苦寒行

劉澄甫

西北度燕然屹崛何盤桓
戕戕千里雪漠漠萬重煙
積水滿溪澗枯樹被岡巒
悲風起巔末白日沉虞淵
飢飈叫空壕猛虎藏深巖
貂裘不覺暖挾纊曾知寒
將軍喜候封戰士多苦顏
長城埋白骨窮廬擁青氊
塞馬鳴不息高鳥飛不還
平生征戍勞寤寐誰與宣
難哉苦寒行聞之尚心酸

前題

黃卿

都城怯冬候邊城寒復寒九邊同凜冽雲中冷且艱萬
卒圍城下睂睂鬱愁嘆逆豎戕主帥豺狼據重關相臣
按劍怒猛將亟登壇露野相枕藉半菽風中餐白登雪
霧集桑乾層冰堅又聞長征人呵手繫征鞍左隊泣墮
指右伍傷凍顏苦寒何足慰僵屍那忍看幸逢明主恩
挾纊誓相安條風扇和燠不戰凱歌還

前題

劉淵甫

北風初涼雨雪初飛居家蕭蕭遠涉何依天下皆寒獨

念遄征慘肌裂膚東山之行腹無宿飽身無重襖朝起
見星夜眠在草披有狐裘坐有熊席爾心則安寧復我
恤

怨歌行

馮裕

巴江浮月色巫山橫露光孤鳥鳴如訴啼猿聲更長遠
客撫七絃欲調不成章臣有逐萬里子有朝履霜桑梓
空悵望江漢浩無梁巧言滅烈火浸潤傾高堂楚士多
幽恨屈子摧肝腸漢武誅江充後時良可傷虞舜放共

驩頌聲流無疆

浮萍篇

相彼萍兮生澤中兮或聚或散隨天風兮相彼萍兮生
中河兮或近或遠隨風波兮相彼萍兮生內池兮或西
或東無不宜兮

前題

黃卿

秋水見浮萍隨波何菁菁華不借黃壤葉不附菰菱萍
生無根蒂男兒重橫行浮雲不可挽紫駟驕欲騰入山

縛貔虎蹈海斬鯢鯨浮萍蔽波面下有百尺鱣萍流入
江海藻泛金沙灘借問萍與藻附托何偶然健步自千
里不羨生羽翰達人志遠覽長路何足嘆

前題

楊應奎

木生有根花有萼嗟爾飄萍無所托幸因雨滋不免風
吹倏來忽去安穩難期霰分密布空隨時彼行何行止
何止人生聚散皆如此眼見水上萍更思萍下水

猛虎行

黃卿

獵不避猛虎窟漁不近潛蛟湫潛蛟豈不躍烈夫多懷
憂登高眺霽景所思杳崑丘總轡歷險阻飲馬江河洲
長風吹纓組洪波淬吳鉤晝不求梁肉暮不要侶儔鷗
鵬運渤海榆枋棲鷺鳩寥廓何畏阻硜硜那與謀乞藥
駐容色曦和當相留三復入虎穴慷慨終有酬

天馬歌

馮裕

猗龍種之蹻蹻兮凌瀚澤之淼淼兮失天閑之騷褭兮
負河圖兮文明銜赤文兮舜之禎矯首長鳴兮雄風生

纖阿逝兮伯樂逝兮按圖索華韞珂兮歸有德

妾薄命

妾本良家子嫁與游俠兒燕好能幾何郎心忽自移紅
樓美清夜空閨愁夢思起視天漢斜新月如愁眉粧鏡
空在匣麗服空在櫳有時惟古歡惠然開重帷離心安
可同悁悁倚前楣盛年已見捐況乃薄暮時三復白頭
吟緘愁將告誰

前題

黃卿

團團明月上清輝射羅帷春園百禽集花卉舒榮滋風
歛聞絃管履跡不能移莖篴手已澁蟠子空來依尋丈
踰千里韶光無還期巫姬相女貴骨法非蛾眉玉貌豈
相遠承恩分妍媸婚嫁誰不擇出門那可知連波去不
遠王宋悲復悲齊有化蟬女衛有谷風詩耕莫苦風雨
游莫苦路歧青松無改色誰望連理枝

前題

楊應奎

光陰易逝難留暫登畫閣重樓流蘇帳暖香浮藹若陽

春綢繆華筵錦席相酬稱壽舞獻婆娑塞曲明謳齊歌
觥籌交錯蹉跎開懷盡歡顏酡醲酣飽飫合和周折禮
度容與舉止踈暢沉魚狂態暗生絕裾法語束縛安居
紅顏可悅禮裁標觚挈榼推顏弱質纖體縈迴金珠雜
逕往來目驚心悸難媒黛銷綠減朱顏新聲轉風麗娟
氣噴椒蘭間闌雜進比西並班婉孌愛惜意慳開樽致
歡驕奢祇恐酒數難加興闌客子還家答言杯盤猶賒

美女篇

劉澄甫

燕趙富美女窈窕多清揚麗質無粉澤冶容勝蘭芳盈
盈桃李姿裊裊芙蓉裳細履珠翠飾高簪玳瑁光白如
玉環潔輕若飛燕翔湘妃不可覩巫女詎能忘魚見為
之逝鳥見為之藏明妃度關塞西子傾家邦色荒永垂
戒閒情常自防

飛龍篇

馮裕

仙人駕飛龍飄飄遊太空俯視世間人醢鷄喧甕中一
覽遍八荒稅駕在崆峒雲巘何巍巍澗水何淙淙玄鶴

沖天飛仙桃蒸霞紅我欲訪大道趨風託仙童仙童感
我誠引我瑤華宮拱立日已斜仙人開雙瞳授我一束
書期我扶桑東稽首拜受之漸覺心神融孜孜三十年
大道隔鴻濛願謝人間事再訪青牛翁

前題

劉澄甫

軒轅鼎湖騎飛龍雲輶象御浮煙空花顏月貌爭相從
股肱耳目誰與同紛紛攀髯咸墮弓兩兩玉女偕金童
銀闕差我扶桑東洞天隱約蓬萊中拍手放浪山崆峒

潛身頤養芙蓉宮白雲飄飄真難逢黃金銷灼不可鎔
千秋萬歲傳無窮九還七返如捕風錦文綠字苔蘚封
石函玉笈神鬼工紫皇邀我遊鴻濛叩之不語心忡忡

前題

黃卿

遠遊采芝露冷林谷玉女跨鶴仙童騎鹿羽士在前飄
飄丹鵠趨進謁之期我辟穀赤幢雙導層城在目石英
芳蒨玉膏滲漉言有大藥貯之海屋靈符三緘慶雲垂
覆我無盈心粒丹自足霜華少黑老色少沃逍遙常居

消中情毒馬能霞霄寥廓幽獨

白馬篇

馮裕

長安有名將白馬何翩翩俯身馳大漠一劍當三邊萬
竈如雲屯青天明月懸一鼓破月氏再鼓擒左賢單于
聞之驚旃裘夜幾遷瀚海不揚波勒功在燕然榮名耀
青史嫖姚應共傳

前題

劉澄甫

白馬躍飛龍騰驤萬里行霜蹄蹴烟霞玉勒繞玲瓏背

上鷗羽箭腰間烏號弓盤雲落霜鶚映日下冥鴻已麗
驃驍陣還堪左校衝單于單騎壘子儀五花驄九寨無
殫敵六郡推才雄轉戰葱嶺道捷報甘泉宮捐軀赴國
難慷慨平羌戎平生意氣在誓勒燕然功

前題

楊應奎

白馬出冀北雕鞍覆錦茵皎皎西洛道蕭蕭清渭津馬
驕鳴不止借問馬上人寶劍銛且博弩弓逾六鈞馬粟
已傾斛人飲亦將醺羽檄流星過邊烽報煙塵虎旅皆

騰趨烈士豈逡巡驅去忽長嘯涼風薄黃雲追奔志慷慨樹功非希恩揚揚錦綺者列乘給翔麟換騎果下馬探賞桃李春白馬同如雪白駒亦如銀乘駒入空谷生芻樂無垠

燕歌行

蒹葭蒼蒼露為霜梧桐飄飄金井沐絡緯啾啾蜩蟬傷
玄燕寂寂白雁翔客子遙遙萬里行美人獨坐悲流黃
秦川織錦非七襄陌上采桑不盈筐深閨熒熒思如狂

參杓斗柄夜縱橫展詩續歌暫徜徉歌罷嗚咽悲中腸
安得君為明月光流影一照妾屋梁披衣疊股坐待明
耿耿銀漢永相望

前題

黃卿

槐街冠蓋何翩翩華堂晴晝玳瑁筵絃管茄吹沸喧闐
玉盤瓊筍紛花鈿中席酬勸嬉留連雄談琅琅同稱賢
千金然諾白日懸肝膽意氣直如弦義和急轡逝虞淵
野薪風烈空浮煙聲名相軋臨要權貨利錐刀誰讓先

炎日涼颼變眼前彎弓落石更可憐吁嗟傾覆自昔然

前題

劉淵甫

楊柳落葉金垂絲鳥來鳥散聲音移他鄉應役復幾時
去何容易歸何遲夢中寄書伸別離緘愁結恨那得知
朝登暮涉心力疲回頭迷望悲天涯衣裳破碎無完肌
篋中舊帛將付誰舅姑已老諸子癡草生壠畝難耘耔
終歲作苦難自持使妾不暇修容儀寬恩有日辭荒陬
踐更算賦敢違期辰橫參暗空相窺風吹月照長相思

上留田行

孩提餅乳相怡怡上留田壯年鬪鬪怨阿誰上留田棠
棣零穉根柯離上留田野中啼號隣翁悲上留田歸家
美酒妻與兒上留田諸兒齒壯將若為上留田

海岱會集卷一

欽定四庫全書

海岱會集卷二

古樂府

鞠歌行

馮裕

荆山產良璞中有寶玉英卞氏偶得之兩獻楚王庭前
後蔽讒言哀哉懷與平祗聞鑠黃金不知毀連城懷璧
固其罪獻玉仍被刑抱璞空山下嗚嗚日悲鳴涕盡繼
以血寸心始得明足斷難再續封侯亦虛名寄語後世

人銜玉難為情

前題

黃卿

時雨足光風飄芝蘭深谷芳且高鳥同色馬同毛
笛竹臨爨桐半焦噓如露叱如飈金珠過海誰為橋
功可擬時難遭謗書貝錦何譏譏桂為檝柏為橈
浪平風順何逍遙

豫章行

馮裕

豫章出深山亭亭一何長深根蟠重淵修幹摩穹蒼
匠

石持斧斤致之京洛旁棟隆豈不美生以才自傷何如
南山櫟根榦常相將

前題

劉澄甫

出處本無定隱顯難俱宣禍福起轉轂是非明蓋棺神
禹禪虞舜祀夏垂永年傳說夢高宗法祖應配天揚雄
乃頌莽樂毅遂辭燕李斯諫逐客田文愛養賢堂與生
戈矛杯酒釋兵權萬事多錯忤倚伏理循環

門有車馬客行

馮裕

客從金陵來倒屣走相迎把袂上高堂共坐話平生訪
舊半凋謝一語心一驚憶在少年日良會羅羣英看花
長干去載酒秦淮行別年僅十載落落如晨星惆悵將
如何千里江雲橫

前題

劉淵甫

出門見遠客試問來何方風塵悴顏色行李惟擔囊相
延入我室酌酒未盈觴忽忽歎遠別俯首兩徬徨世態
豈一端片言安得詳辨容異老少感舊多存亡朝是夕

仍非尺短寸反長世情若蕉鹿出門皆羊腸不能順流
俗何不歸故鄉門巷尚如昔桑棗已成行光陰無回期
人命同朝霜親舊每相見丘隴幸未荒去就兩決絕名
譽徒虛彰

折楊柳

手攀楊柳枝上馬別親友父母願榮顯妻孥爾何有富
貴一朝得豈謂日復久黃金炊玉竭白壁馬自售季子
裘已敝買臣婦不守平生意氣在肯令此言負再整青



雲冠仍啟談天口致身霄漢上功名稷契右白晝忽歸
來黑頭曳紫綬誰憐貧賤交旦夕成老醜

放歌行

劉淵甫

氷蠶不知寒火鼠寧識春物性安所習志士曾因循鳳
歌避塵世龍躍升天津三聘往草野一顧傾渭濱即圖
國士報肯虛明主恩短服謝韋布華組挂朝紳戚姻待
舉爨賓客喜乘輪志滿氣亦揚滿前皆交親人自敬長
史賓主徒殷勤

東武吟

石存禮

古有豪俊士，混跡蓬蒿中。
劍耻一人敵，射學千鈞弓。
獵手應石虎，釣竿拂飛熊。
時違困文史，壯志喜從戎。
赴募燕頷相，麾下猿臂公。
西報玉門捷，北勒陰山功。
張騫既已老，李廣卒難逢。
謝職困郵吏，帶酒過新豐。
客散亭障暮，囊罄杯盤空。
西山景將歇，東武歌徒雄。

出自薊北門行

劉澄甫

幽薊饒霜雪，先秋即凜冽。
風土尚獷悍，征徒各雄傑。
捐

生乃其常不啻荆與棘計斬單于首誓飲匈奴血泥封
玉門關馬躡龍堆缺朝聽漁陽鼓夕望燕山月憑高瞰
狼胥乘危探虎穴陣冷鳥不下河冰骨欲折羽林本孤
忠中郎弊旌節歸來圖麒麟生平重閭閥

前題

黃卿

薊門連亭障北望白草腓堯封遺溝洫秦塞何累累征
馬飽苜蓿干旌映珂戰鏡吹風轉急狼烟騰復微生飲
鵬鷃血戈劍瑩生輝撩揭男兒健相逐誇戎衣行行聞

野哭言寇掠且歸挺身出大漠武士爭追隨誓射天狼
落寧言貌虎威問我馳驅志庇民奠邊陲首功報幕府
將為刀筆欺桓桓烈士恨犒爵竟何為

空城雀

馮裕

空城雀空城雀蓬蒿仰而棲藜藿俛而啄黃口易採取
短牆非所託腥臊豈足薦驚刀彈射時復遭兒曹雀乎
雀乎將奈何鳳翔千仞無虞羅

行路難

石存禮

行路難路多歧青天白日光照地出門相背東西馳憶
昔貧賤時兩情如膠漆共言生死不相違握手披肝誓
天日君今得意成大勲金章封侯蒙主恩一朝富貴誰
能及翻笑傍人百憂集平生金玉安足論對面不肯下
車揖世事悠悠寧可期芳春花木秋易衰冰霜歲寒不
改色却羨南山松柏枝

前題

黃卿

歌莫歌塞下曲吹莫愛胡笳長古溪沙埃白草仆陰山

苦霧連大荒健士馳驅幽閨泣容華何如筋力强丈夫
骨相分茅土陰符弧矢空昂藏蔡澤頰舌一朝貴白頭
飛將事戎行

團扇郎

石存禮

團扇團且潔人言似明月明月恐不如長圓未曾缺

前題

馮裕

贈扇不贈鞭畏行千里道對月與搖風郎亦知多少

又

人言秋葉扇入篋更為珍我亦收綵縷明年綰復新

前題

劉淵甫

步階無纖塵出袖半遮面一日幾回看即與郎相見

前題

楊應奎

秋風歇團扇郎心中道變慙慙度歲寒夏來還相見

碧玉歌

馮裕

春風桃始華碧玉入王家金杯深綠酒麗日明朝霞

前題

劉澄甫

碧玉破瓜時鬢髮纔覆額朱顏奪天桃黛眉學新月

又

碧玉破瓜時即誦白頭吟千金學歌舞一笑傾郎心

古別離

石存禮

北風吹征帆飄飄西南馳山川聿修阻霜露忽淒其顧
我遠行邁豈不念歲時歲時豈不念簡書良在茲翩彼
晨飛鴻翱翔亦何之感我同袍友感感懷此離此離雖
可懷觴酒當載時願言崇令德金石以為期

前題

馮裕

良人將遠涉離別在斯須
褰裳問歸期涕淚揮堦塗
去住各長嘆莫忘舊歡娛
人生有離合譬彼天邊月
三五清輝滿虧缺亦倏忽
月虧行復圓人歸看白髮

前題

黃卿

江南送別處芙蓉遍池塘
江北送別處青楓夾垂楊
折條不折萼相對惜幽香
閨中懷征戍臨歧餞舶商
江樓高十仞登眺渺蒼蒼
孔翠出嶺巘西驥入漢疆
舊侶亦

慨戀何況阻彼良名都理征轡迢迢道路長道長何足
惜薄言添襦裳今別愁在貌古別鬱中腸四座且停詠
離弦弛莫張願吹簫與笛招鳳還梧桐

晉白紵舞歌

馮裕

越姬白紵鮮如霜
竭來裁作舞衣裳
青春宛轉耀日光
中庭翩翩白鳳凰
四郊無事和風揚
大官卓午瓊筵張
有酒百壺清且香
君臣同心方樂康
高歌妙舞殊未央
人生少壯焉能常

前題

黃卿

名苑風和紅粉飄
瑤席繡茵落翠翹
燕箏趙瑟按秦簫
齊著白紵解綺綃
輕袂宛轉舞脩脩
躑步躍履折楚腰
對蹲轉盼離復招
鴛鴦翩躚雲影搖
吳蜀混一海澄清
徵歌選調咏太平
江南白紵機杼精
皎皎霜練致洛城
有美春服製初成
絢麗未知鶴羽輕
簪紱高會傳金觥
願主福壽山嶽并

野田有雀行

石存禮

十畝之間雀啾啾止蒿集萊鳴相酬遠川遙陌路孔修
原田茫茫禾黍稠秋來古樹風颼颼夕陽慘淡沉西丘
羣飛羣下不相求銜穗食穀安無憂南有樛木在芳洲
雌雄迫暮共依投咄哉茲禽多詭謀性行佻巧孰與儔
非羅非丸致無由草竊奸宄將何尤吁嗟此鳥毋久留
願汝化蛤湮東流

齊謳行

劉澄甫

齊國善諷謠齊女能謳歌臨淄佳麗地貴富侯王多營

丘據形勝十二當山河迤邐瑯琊饒膏腴即墨奢漁鹽
並杭稻海錯紛交加浮磬有遺音孤桐挺陽坡檠桑中
琴瑟綵締勝綺羅桓公敬仲父威王烹東阿田單走燕
騎魯連卻秦戈天道豈常泰人事或坎軻君相胥汨沒
霸業終蹉跎達士解止足去去將如何

前題

黃卿

齊瑟調素越蕭管自伶倫舜冑傳韶樂師摯正雅音季
札精賞鑒綿駒何足云爽鳩肇茅土尚父治維新青陽

條風起萬化先受春產殖兼海陸充牣腴且珍澌渤深
無際岱宗崇入雲洪河界右址肅慎直東隣疆域何膴
膴形勝當西秦輔周表列國一匡濟生民稷下萃文史
俎豆饗耆賓高風魯連倡義烈王蠋敦俗尚輕千駟風
韻流千春

關山月

馮裕

關山月皎潔如清霜連營接幕夕流光流光猶得照故
園征人見月徒傷魂四時弦望如流去可惜韶華暗中

度深閨少年兩別離還如嬋娟缺半規缺半規三五來
復圓一身遠戍何時旋

前題

劉淵甫

關山月關山月萬里清光有圓缺宵從溟渤出微茫曉
向崦嵫看皎潔玉門迢遞交河長鴻雁南飛素書絕機
中錦字織不成隴上征袍泣流血山高行未還月冷身
猶單香閨惜瘦影戰地增苦顏雕弓明漢壘鐵馬度蕭
關長安樓上客把酒愛高寒

臨高臺

馮裕

寒雲起天末，獨自上高臺。
塞鴈東南行，淅淅西風來。
昔我同心友，渺渺湘江隈。
凌空望湘江，秋老芙蓉開。

前題

劉澄甫

臨高臺，水淥芙蓉開。
文茵繡轂坐，瑤席鳳笙龍。
管吹落梅北，瞰銅雀館春風。
階草短，南眺臨春閣。
夜雨江花落，東上鳩鵲觀。
西對蒲萄宮，闌樹重疊綠。
山櫻寂寞紅，新豐遠接青雲起。
長安甲第朱門裏，舞榭鳴鐘日欲西。
佳

人取醉典羅衣雕簷繡柱盤龍虎豪客探鉤月卓午兩
兩鴛鴦水面飛蕭蕭螢火窓前度景物不可留幽懷向
誰訴憶昔咸京繁盛時可憐東洛並芳菲只今桃李皆
無主何處牛羊仆墓碑高臺高臺不可上章華柏梁塵
土障

前題

黃卿

臨高臺俯檻前有芳桂芳以樛河水浮槎望如舟蒼鴉
雲起翩以遊持九擊鶚祈我親壽千秋依中流

洛陽道

劉淵甫

洛陽昔全盛
輳集競繁華
歌鐘連九陌
樓臺接萬家
御水年年柳
名園處處花
嬌艷固絕倫
相逢日又斜
地形控襟喉
雄圖匪矜誇
盛衰雖無端
變動先萌芽
世事隨轉燭
晚路如奔車
人物偶蕭條
感念長咨嗟



海岱會集卷二

欽定四庫全書

集部
海岱會集卷
三至
六

詳校官中書_臣孫衡

侍讀_臣孫球覆勘

總校官降調編修_臣倉聖脉

校對官中書_臣潘曾起

謄錄監生_臣周敦復

欽定四庫全書

海岱會集卷三

五言古詩

黃金臺

馮裕

燕山高嵯峨燕士多悲歌
昭王黃金臺矯矯青雲阿
屈身思致士禮意為網羅
樂毅與劇辛千里皆相過
意氣成風雲談笑開山河
一朝失英主勲業如流波
黃金不改色衆口一何多
二城乃反覆一簣竟蹉跎
悠悠國士

心遺恨當如何

詠懷

世路何嶮巇散步亦不展人生能幾時白日忽已晚我
欲騎赤蚪陟彼蓬萊巘醉來問麻姑滄溟今深淺

前題

槲棘花如粟相近紅槿籬采采不可贈可贈不可持桑
柘墻下植松桂山中移物理自有分堅貞勝華滋掃場
留粟粒為恐野鳥飢並生大塊中飲啄將同歸

前題

虞人養麋鹿童子養雛鷺飲啄非不厚豈適羽毛情林
卧玩空翠墟落謝經營霞舒炫幽澹谿靜轉琮琤軒冕
忽枉顧掃徑啟柴扃但禁犬出吠不知鷗鷺已驚始返志
自定諒盡歲寒盟

前題

劉澄甫

百襲寶燕石千金學屠龍其如敝帚價還知康瓠功時
違貴者賤勢重拙者工西陂泛舟楫東臯事春農俯仰

尚自得讀書日從容已謝簿領勞頗守山林窮溪前蔭
灌木屋後樹青松白鷗忽下來正堪對海翁

又

枯桐在錦囊藏之三千春白玉間瑤琤黃金斲朱紋月
明一披拂悠然散埃塵有價不能售猶如隣女貧顏色
豈不好絃歌非不新彼方惑嫫母徒使江妃嘯棄擲鼎
作瓠鄭重艾為芸世事豈足道長歌激青雲

前題

黃卿

南山杳青靄平野望峇嶺上有梧千尺離奇鬱干霄高
鳥凌風下結構十圍巢飲啄靜自足煙露養羽毛晴晦
誰豫定漣漣時自消玄髮夜中變晨起空我勞

又

羽人攜玉管題我白雲居雲水自夙願今茲急菑畬東
借養蠶譜西借相牛書聞占風雨好所願豈在餘野兕
不厭食耕牛不厭癯逸豫復焜燿嘖嘖與我殊

前題

楊應奎

青樓臨流水水流何濺濺上有愁思婦中有萬里船欲
寄相思信撥柁捷如烟抱琴歌一曲知音有誰憐曲罷
不忍續淚下如流泉夫婿樂新歡何時理斷絃

又

湯湯黃河水來自崑崙山萬折始東下迅流逐驚湍日
夜奔赴海何時復西還龍門豈不險砥柱豈不艱泛泛
中流楫遡洄良獨難過時終有悔乘勢稱明賢壯士中
夜心感慨傷肺肝

澠水田家

馮裕

好雨遍郊原禾麥忽漸長荷鋤勤耘耔新晴風亦爽西
山遠峰青澠水層波響水邊綠樹深黃鸝鳴下上蠶老
絲何長麥熟穗仍兩早晚夏稅足村村歌擊壤

又

昨夜秋風清百穀滿原隰短鎌久在手收穫一何亟
築場見蟻穴中心為惻惻茅屋四五間俯仰皆飽食牛犢
下山來黃鷄亦在杙雪飛燒勞薪地爐夜不熄煨酒熱

如湯呼童烹小鯽忽聞催科聲一犬吠籬側

前題

劉澄甫

莒葉日已綠杏花日已白澠水春茫茫石田灌沙磧曉
聞倉庚聲夜寧安枕席秉耒効躬畊買牛代僕力驅咤
上東阡開墾及南陌水畊火斯耨春種秋及獲泄泄澤
雉雒油油禾黍澤青青桑柘陰渝渝溪流碧婦子饁于
畝老翁嬉于宅辛勤誰為恤豐登差可憐稅薄官府清
酒熟鄰友益帝力委不知田家聊自適

又

負郭但有田繞屋多植桑柔條吐新萼蠶蟻如針芒戴
勝幾時降嬾婦弄月璫夜索絞細薄曉斧推枯楊晝午
蠶正飢日暮桑盈筐穉子哺雛戲隣女知我忙綺羅試
麗服璧玉炫新妝三眠待老食一夕不能忘練成白雪
絲織就黃金裳有珠豈充飽無襦難禦涼田家半苦樂
欲問心茫茫

前題

黃卿

楊柳墟落盡斜徑傍鳴湍芳蓀遠蓬華高樹出炊烟南
嶺忽微雨樵父扣柴關稚子驅黃犢荆布適葵荃簷前
積藥草桑下縛魚竿開柵放鷄鴨競啄紅蓁灘丁男早
輸稅老翁有歡顏夕陽倒濁酒浩歌擊壤篇

又

鄉約咸禮遜坐石叙情親相誇禾黍茂復言子姓淳女
莫改結束男莫厭耕耘麻池通綠水鷗鷺到衡門城郭
耀錦綺機事奕局新芳艷念搖落馳驅有悲辛春秋共

社祀竹筴祈土神上言風雨順下言官長仁俯仰同怡
曠歲晏烹鷄豚

前題

劉淵甫

停車入田家坐我澠水傍飲我春甕酒納我槐陰涼杖
屨三兩翁相與談衷腸今年二麥少苦被飛蝗傷鼓鑼
互擊咭捕逐多奔忙近連官家租舊穀先空倉強留絹
在軸欄內幾牛羊休除心內病且救眼前瘡日夜望禾
黍不見禾黍黃入口無飽飯上身惟粗裳貧富有衣食

誰願進公堂樂少苦時多數日思安康

又

田夫不生疾田婦不生妬兒女共嘻笑等閒少嗔怒五
穀半收成四時多雨露身外何憂愁從容度朝暮編荆
慣作扉繞屋更栽樹無事不入城愛向村中住偶爾招
親朋歡顏好相遇正值黃鷄肥園圃伸薄具彼我俱真
率荒涼有佳趣膏腴知難得朴實無他慕自然生善心
終歲惟土務

前題

楊應奎

我屋近南山我圃連滄洲田疇時雨足禾黍正油油閒
步看晴野偶然隨海鷗何期柴門下好客為我留盤俎
無兼味瓦缶注黃流一斟復一酌賓主醉沉浮傲然天
壤間坦率更何憂送客出門去北牕風颼颼五柳亦何
人此意堪與儔

又

刈麥復種豆枯槎嫩芽長積雨荒草萊揮鋤去其芥縣

胥催夏稅東西號呼響斛麥輸官倉中心獨惘惘夜眠
背始帖粥食亦安爽策杖看山雲野老共來往相與話
桑麻多言今勝曩貧者雖無食禾黍亦可仰歸來頌七
月可以當擊壤

幽居

石存禮

幽居近城府而無城府迹耕鑿樂歲時樵木共朝夕鳥
啼芳樹深犬吠村巷僻乘閒或杖屨有酒邀隣客掃石
奠盞聲藉草為茵席陶然忘外求所願非所適

前題

馮裕

解綬二十載卜築此屋廬茅茨自翦伐歲月忽居諸石
田八九畝榆柳三五株呼童課耕作植杖聊舒徐閒門
白晝寂村中嘉客疎時有田夫飲曾勞長者車持竿惜
黍禾驅雀登邱墟平生巧智絕但喜子孫愚細酌瓦缶
酒慢摘荒園蔬涼颺動籬落安飽願無餘

前題

劉澄甫

我屋對西山青溪臨北牖誰謂義皇人自學蒙莊叟燕

崔易幘鴻鵠爾何有長歌伐木詩輕擊種豆缶行玩
溪上魚坐憩門前柳畦同漢陰灌耕與沮溺耦菽粟足
朝夕圖書忻左右晚年好道術況復厭奔走黃庭朝玉
極白齒緘金口蕭然塵外居稅駕得衰朽

前題

黃卿

素業出郊坰重揖幽棲廬桑麻宜土脉平疇便耕鋤涉
澗玩清溜引溪滋園蔬雜芳間綠篠石磴垂藤蕪白雲
沒巖岫蒼嵐忽有無四時絕氛雜樵木相招呼松葉醲

秫酒野酌斷瓜壺
猿鹿狎羔犢白鳥集松梧
優游逾臺榭十畝等江湖

又

夙愛滄洲濶歸來體力康
茅茨預綯索薜蘿結垣牆
奇石移當牖修竹植成行
靜較養鶴訣博求朮苓方
宛宛素志友琴書在隣莊
野徑恣迎訪嘯咏對藜牀
探賞遍林壑登頓互扶將
慮淡中如腴志寧日晷長
門前撫鷺鷥游衍莫相忘

前題

劉淵甫

敞扉隔塵市過往無塵車旁人多笑僻吾獨守吾廬草
色自青青當門不須鋤出門步先懶延客髮纔梳不沾
簾肆名即同巖穴居何以度歲時賴有古人書陋巷豈
不足高棟空有餘違世甘所終安常獨晏如

又

靜處非寂寞適已即坦平少識敢絕交似野仍在城陰
隨碧梧密風動松柏聲雖無桃李繁頗覺蓬茅清琴招

舞鶴至道為灌園成已愧青雲姿多從白石生久卜鄰
翁好不為侯門營門外各有求世路徒縱橫

前題

楊應奎

卜築當郡城而我居獨幽深巷輪蹄遠小園樹木稠牆
垣甃白石前街臨清流茅屋僅數楹圖書列四周牀上
懸鳴琴古調莫能儔秋風颯然至披襟一坐酬眼前無
長物竹菊三兩疇日午密陰轉散髮詠公劉真樂在讀
書日與聖賢游或時忘盥櫛巾服亦懶求但祝年穀登

非為稻梁謀

與友人野飲

馮裕

地僻塵埃淨幽居嘉樹林故人忽相過攜壺就清陰南
溪瀉長湍西山出遠岑野花向我笑山鳥為我吟一觴
間一詠觴盡還自斟相對無雜言蕭然獨鳴琴琴亦不
在絃極目白雲深

前題

劉澄甫

山林殘暑退尊壘高晏初不願華屋醉但約野亭沽同

心五六人興至命巾車出郭謝塵鞅列席俯厓隅石榻
坐自叙水閣行相呼開襟對蘿薜登高酌茱萸青山作
屏障綠竹蔭庖厨折荷當杯杓聞鳥吹笙竽翠烹沼沚
菜白煮溪澗魚引滿不用勸日暮歡有餘歎息時易邁
放浪豈常俱細讀止酒詩陶令非區區

前題

黃卿

登臨客不速相將步郊原藉草諧嘉會匏樽采薇荃蟲
鳴時序改既雨林芳鮮絳雲卷復舒羣山當目前拾薪

烹鷄黍瓦釜支顏垣遠聞樵牧曲倚和白雲篇物儉跡
自雅志洽物無牽畧移索杖屨中飲戒流連

前題

劉淵甫

暮年寡儔匹郊設惟常饌良友對舉觴笑傲非荒晏語
言合倫序巾服隨簡便我生知止足於世無歆羨行吟
寧幾何物態忽催變雜花映瓦缶微風吹酖面北山不
剪萊榮辱空交戰歸去命兒扶就中有真見

止道士伐雲門山石

劉澄甫

澤居宜惜水巖居宜愛山天物豈可暴物理固其然道
士遠方來結構雲門巔鑪屋亦奚為而使山石殘開山
不種玉移石匪補天本意事耕稼胡乃專鑿剏碧嶂失
顏色丹崖損巔屹吾將訴真宰願保貞堅全五丁鑿劍
閣巨靈劈華巔道路雖日闢混沌恐不完從茲祝山靈
永為護層巒

三顧圖

黃卿

昔人重繪畫解寫高人跡斯圖三雄姿一蛟兩虎猊凌

欽定四庫全書

海岱會集
卷三

十三

空蹴山氣面帶憂時色山徑匿車徒中林收戈戟蒼岡
松桂叢衡茅卧龍宅名並渭濱隱才包管樂策奸雄耀
百戰帝胄一何厄渴問渡海津獲假擎天力一顧阻煙
霞再顧虛泉石三顧罄虔恭掃廬愜迎覲坐談定鼎足
慷慨分漢賊驅馳許致身魚水歡莫逆皎皎莘野聘洒
落協真契兩將本迅烈宛宛同尊德魏吳多健夫俛首
鷹犬食厯數有向背漢疆難再闢成敗論豪傑鉛鐵愈
圭壁寥寥曠千載披軸三嘆息

前題

劉淵甫

華封拜乘雲崆峒請順風聖帝及明王師士恒相同披
圖想枉顧先主三曲躬疆域久運籌禮貌宜尊崇不然
孔明輩輕舍草廬中志定時有違食少事無窮真才天
固縱炎祚運自終分鼎勢已去卧龍谷遂空仲達怵遺
烈出師表孤忠本愜高祖墓豈比商山翁興敗難逆料
遺像悲英雄

謝安石遊東山圖

劉澄甫

欽定四庫全書

海岱會集
卷三

十三

吾生愛山水頗悉登臨興安石何為者獨占東山勝丹
青殊好奇咫尺千里徑石頭若虎踞長江如練靚微茫
煙氣浮杳靄雲霞映但見古寺宇不聞石鐘磬綠樹隱
琴樽紅顏似歌詠彷彿世上仙沉湎酒中聖淡掃華嵒
虛重抹金陵盛陽陂草木光陰厓巒壑瞑狂遊折屐齒
清談麾麈柄遙指廊廟姿豈是山林性九原如可起蒼
生今已病

初冬宿田舍

馮裕

滌場忽孟冬白日壓西谷牛羊飽知還羣鳥投林木余
本田間人合就田家宿主人出相迎白髮被野服空庭
陳耒耜小業無簡牘不復知城市相對話耕牧且喜年
甫登況復酒新熟佐酒有野蔬授餐惟豆粥禮意雖坦
平語言頗諄復村犬夜不驚日高睡猶熟桃源不可尋
時就此茅屋

前題

劉澄甫

十月日初吉祭掃歸瑩麓山蹊未百里薄晚田舍宿入

欽定四庫全書

海岱會集
卷三

十四

門見蒼松夾道滿修竹老翁出款接童子相追逐黃雲
未登場白煙草屯屋移席俯寒流開味羅野蔌霜枯蟹
尚肥桑落酒應熟擊鮮收兔置投竿啟魚簾持盃每勸
酬淳雅甚可掬不覺情意洽但見話言瀆諄復戒車徒
殷勤慰僮僕犬吠明月上犢鳴霜檻伏清晨別主人長
嘯出林谷身世浮雲空富貴鳥過目浩歌歸去來田園
遂幽獨

前題

劉淵甫

首冬罷田功野夫同棲息履寒趁晴旭茅廬亟修飭留
憩近青山良夜轉閒寂隔溪聞昏鐘床上見促織微月
稍流輝庭階澹生色焚柏煙相縈燒葉竈欲熄短檠讀
南華倦即展茵簀拊枕魂夢安頓覺銷結習鷄鳴各營
趨回首猶佇立

海溢

劉澄甫

東方有靈海萬水咸朝宗委輸端不竭歸墟積難窮乾
坤朝夕池日月升沉宮湯旱未云嗇堯水寧聞豐嘉靖

欽定四庫全書

海岱會集
卷三

十五

丙申歲十月當孟冬海水忽簸揚夜半聲如鐘浮楂落
碧漢若木捲飛蓬天吳發震怒陽侯爭長雄碣石濺漂
沫鵬翼搏高空側岸走黿鼉遠峰卧蛟龍斯民化魚鱉
劫數嗟遭逢室家盡汨沒妻孥困蒿叢百里俱浩渺村
落無遺蹤營窟尚無托何事共租庸誰能鎖支祈為我
息颶風桑田如可變露禱迴蒼穹

白髮

馮裕

去年一莖摘今年數莖白去年顏色好今年顏色老人

生安得長青春喚歌賞酒休辭貧黑頭一白難再烏君
不見秋草枯

前題

劉澄甫

人見白髮憂我見白髮喜憂多勲業長喜遂室家邇想
當初白時星星數莖起朝夕頻覽鏡拔鋤以未已種種
至華巔愛惜復修理返黑頓覺難從白得衰始悠悠思
古人茫茫孰可擬二老歸周王四皓翼太子聃耳度函
谷榮期樂桑梓出處本不同髮白一而已吾也老無用

所幸尚有齒終賈愧已多廣受頗知止白髮如有神歲
除謹當祀

前題

黃卿

昔我視壯士垂素屢嘆惜晨梳見數莖慙慙憶頒白頭
顛無零霜明鏡點鬢黑日月迅馳馭形質豈金石營營
思無限辛疲兼憂戚大藥未可成鑷拔漫何益知哲諒
同然旨酒娛朝夕

前題

劉淵甫

已知老漸至不謂髮便白深藏亦何為欲變渾無策每
為白髮嘆髮返向我責萬事隨逝波百年如過隙未來
尚足待既往空念昔如雲盛有時似雪竟何益從今復
覽鏡自遣仍自釋中歲已蹉跎晚途省奔役

謝僧惠茶

老衲採山華碧茗樹方茁弱荻如剪韭長芽捲雀舌曉
露徐挹潤晴旭暴復潔緘藏香積久持贈意獨切滌鼎
汲冽泉刈薪自煎熟悠然酌瓦鉢渴喉慰甘飮吟哦興

轉豪煩囂遽清澈方外有賞音市飲徒鋪啜施金轉恐
俗答贈有薇蕨

冬陰

馮裕

玄冬風怒號同雲四野起雪花萬里飛凍合滄溟水玉
樓驚高寒窮簷半生死曝背我無由何以獻天子

過揚子江聞金山寺鐘

楊應奎

布帆江上來蒼茫問京口潮隨瓜步上船泊金山右海
門月初出炯炯照高牖澤國煙未滅蕭蕭映枯柳巉巖

嵌招提虛空煥星斗僧去自鳴鐘客來且沽酒悠揚物
外音杳藹雲中叩始疑老龍吟忽訝鯨魚吼老衲起晨
炊漁郎候畧畱鍾陵霜落初姑蘇夜半後翻憶長樂宮
衣裳遂奔走薄業豈足銘虛譽徒爾負明發戒征途天
涯重回首

擬涉江采芙蓉

馮裕

涉江采芙蓉芙蓉花正開采之寄美人欲寄平生懷美
人在白雲三年與我乖有恨不能飛日暮登崔嵬

前題

黃卿

海州有靈藥兼之華莖芷我願采且擷結束寄知己道
路修且阻行行隔江水昔君遺素管拂拭常在几朗月
瞻望同停雲空復爾豈無杯酒歡素心良如是

擬明月何皎皎

馮裕

明月何皎皎四壁蟲聲悲良人別三秋夜夜夢清輝忽
覺不相見披衣倚雙扉南來雁行多何以音書稀願逐
雙黃鳥凌風奮翅飛

擬古三首

東方有扶桑盤踞幾千里枝葉拂紅日根入滄溟底仙
遊十二洲鶴馭時一止日月忽往來脉脉無終始美人
隔湘江寄我一書緘情意殊委曲字畫復嬋娟藏之懷
袖中時時一披閱人生非金石能堪幾迴別秋風入孤
櫺疎窓見明月

梧桐在朝陽雖離鳳凰鳴神龍騰碧海靄靄濃雲升上
有堯舜君臯夔列明庭寄語悠悠者洗耳難為名

擬西北有高樓

黃卿

北望鬱峻極層閣薄青冥飛甍接山杪簾箔疑明星臺
陛不可躡杳然朱絃聲一鼓涼思起轉奏微霜零倏疑
素女調轉傷戾戾情悠悠度縹緲願言徹泰清音節何
足異感慨極平生終當招鴻鵠翩翩翔滄溟

前題

劉澄甫

西北有高樓岌嶭接閭闔森森虎豹維隱隱虬龍窟沉
沉九重深茫茫萬里濶大明麗崇霄浮雲忽闇習白虹

貫非常機槍出為孽雖鍊五色石疇能補天闕力開衡
山雲莫解明主惑直道罔不黜俛首三嘆息

擬青青陵上柏

黃卿

營營花上蜂栩栩園中蝶浮生已多勤爾亦競時節日
馭西赴急同願樂者耄良時坐朗暉不遊空自潔名城
多貴介樓閣何茂業寶馬遍坊郭會晏羅醇飴盤桓盡
歲華豈復知愁絕慷慨自無當硜硜哂疎拙

擬今日良宴會

今我何不樂良朋自相招園蔬滌清沼瓦壘開醇醪中
席忽擊筑客起吹洞簫賞音握我手會意豈歌謠遠眺
指仙島仰視杳丹霄誰言羽翰捷跼蹐對蓬蒿

海岱會集卷三